

曾文正公奏稿

曾文正公奏稿

卷之二十六目錄

奉 旨分條覆陳摺

同治三年八月十三日

金陵陸軍請獎請卹摺

全日

密陳李元度等屈抑情形摺

全日

繪呈安徽地圖並長江圖說摺

八月十六日

曾國荃請開缺調理摺

八月二十七日

湖州廣德敗賊犯歙官軍截剿屢勝摺

全日

近日軍情片

截停淮北餉鹽設法整理以復舊制摺

全日

江南貢院工竣請放考官摺

九月十一日

皖南北兩岸肅清摺

九月二十七日

報銷皖省抵徵摺

全日

遵旨馳赴皖鄂交界督兵剿賊摺

十月二十二日

密陳才力竭蹶難勝重任片

交卸督篆仍回本任摺

十一月十八日

欽奉諭旨分條覆陳摺

十二月十三日

查覆淮北鹽務摺

全日

豁免皖省錢漕摺

十二月二十八日

奉 旨分條覆陳摺 同治三年八月十三日

奏爲欽奉

諭旨分條覆陳仰祈

聖鑒事竊 臣 歷奉本年七月十一至二十七等日

寄諭以江皖暨各路軍事殷殷下詢如遣撤勇丁及查洪福瑱  
下落兩事業於上月二十九日覆奏此外奉

旨飭查之件尙多謹一一分條詳對爲我

皇上陳之

一恭奉

諭旨垂詢江甯城內情形若何居人能否漸次復業貢院有無

損壞應如何修葺之處飭臣查明具奏一節查江甯省城賊踞最久居民流亡殆盡此次官軍克城羣酋縱火焚燒昔年巨室富家改造僞府微有存者此外民房極少故克復幾及兩月街市尙未復業臣嘗至貢院履勘一次至公堂衡鑒堂明遠樓未經毀壞號舍一萬六千餘間亦多完好惟號板全數毀失監臨主考房官提調監試各屋膳錄對讀彌封供給各所片瓦無存均須蓋造現經派員在鄂皖等處採辦木料廣集工匠飭委記名臬司黃潤昌趕緊興修擬於九月奏請

簡派主考銜

命南來於十一月舉行鄉試庶冀士子雲集商民亦可漸次來

歸矣

一恭奉

諭旨江甯克復旗營駐防事宜亦應早籌辦理飭臣等妥籌款項迅將江甯京口駐防房屋早爲建蓋以資棲止其兵丁俸餉能否卽行照例全支之處並著妥籌辦理現在京旗駐防生齒日繁如挑其閒散陸續撥補江甯兵額能否有裨酌量具奏等因查駐防旗營亟宜修理臣已於七月初七日陳奏及之惟一時大工畢舉籌款實難擬俟貢院工竣次修江甯旗營又次京口旗營工作有先後之分庶籌辦有措手之處昔歲賊陷江甯旗營三萬餘人幾同一燼被害之慘甚於京口殉節之烈甲於

天下十餘年來陸續增添現存不過八百餘人籌餉尙易爲力  
臣擬將江甯滿營概發全餉其京口旗兵業已挑補足額俸餉  
較鉅應請仍照現辦章程暫給半餉一俟庫藏漸裕續行奏明  
一體全支至挑閒散京旗以實江甯兵額亦俟修蓋營房規模  
粗定會同富明阿續奏辦理

一恭奉

諭旨據御史陳廷經條陳善後事宜內疆輿略爲變通一條飭  
臣等酌度形勢妥籌具奏并鈔示陳廷經原摺一條臣查蘇皖  
未分之時跨江淮而爲省古人經畫疆里具有深意我朝  
聖君賢相未嘗輕議更張若必畫江而分南北兩省則亦宜畫

淮而分南北兩界淮北如蘇之徐州皖之潁州將割隸何省乎  
唐之十道宋之十五路其於江南江北皆截然分而爲二與該  
御史所奏大指略同然唐自中興以後聲教不行於河北宋自  
中興以後號令并不行於江北畫疆大明未必果能久安論形  
勢控扼之道守江南者必須先固淮甸棄淮則江南不可保昔  
人如吳師道胡安國楊萬里暨趙范葉適輩言之詳矣臣愚以  
爲疆吏苟賢則雖跨江跨淮而無損於軍事吏事之興疆吏苟  
不賢則雖畫江分治而無補於軍事吏事之廢此等大政似不  
必輕改成憲區區愚見未審有當萬一否

一前奉兩次



諭旨垂詢楊岳斌赴任後鮑超謀勇素裕能否勝督辦之任頃  
又奉八月初二日

寄諭飭楊岳斌迅赴陝甘之任臣前以江西軍務雖已得手而  
侍逆未受大創趨重南贛湖州等股又將續入江西咨商楊岳  
斌暫緩赴任正在具摺覆奏間再奉

諭旨驚悉新疆失陷三城又經飛咨楊岳斌迅赴甘肅想該督  
接奉八月初二日

諭旨亦必刻日起程專疏覆奏矣鮑超戰功最偉屢次收降巨  
股賊中服其威信自足勝督辦之任惟目下湖州克復江西軍  
務應分兩路辦理鮑超現駐撫建應責令專顧北路備剿湖州

廣德續至之賊劉典席寶田江忠朝王文瑞劉勝祥韓進春等現已併趨甯韻應責令專顧南路追剿侍康等逆上竄之賊果能分任責成撫臣和衷調度當不必另派大員督辦而江境亦可次第肅清矣

一恭奉

諭旨飭臣調派金陵將弁帶精兵萬人從英山一路前進與楚師會合夾擊一節查前此皖南北邊境喫緊臣卽在金陵抽調朱南桂八營馳赴皖南進剿廣德一路劉連捷十營朱洪章三營渡過皖北防剿英山一路不謂調撥甫定羅田蘄水之賊已於七月之杪犯英山圍撲我軍蔣凝學雖迭獲勝仗而糧路梗

塞深爲可虞適廣德已克臣飛催劉連捷朱洪章朱南桂三軍  
悉赴皖北苦於川資無措一俟籌銀四五萬兩卽可迅速西行  
徑趨英霍以收夾擊之效

以上五條皆係奉

旨垂詢飭辦之事除英山戰狀另行詳奏外謹繕摺逐一臚陳  
伏乞

皇太后

皇上聖鑒訓示謹

奏

金陵陸軍請獎請卹摺

同治三年八月十三日

奏爲攻克金陵之陸軍出力員弁遵

旨查明保奏仰祈

聖鑒事竊粵匪竄踞金陵十有二年此各將帥屯營城下功  
敗垂成同治元年四月間曾國荃以偏師東下竭力圍攻二年  
有餘始得仰仗

天威破此老巢洪逆劉尸忠逆就縛悍黨十萬幾無孑遺

微臣

兄弟仰蒙

恩賚渥邀

異數在事文武員弁欽奉

諭旨飭臣查明保奏遵經恭錄轉行去後茲據各營開列勞績等差呈送請奏前來臣覆加詳覈無濫無遺相應繕具清單仰懇

天恩准照所請給獎以示鼓勵其藍翎千把外委仍仿照湖北之例咨部注册現當撤勇歸農之際俾得同戴

皇恩寵耀閭里至陣亡傷病身故之彭迎祥等五百一員名一併開單請

旨敕部分別議卹所有遵保出力員弁及附案請卹緣由謹會同大學士湖廣督臣官文浙江撫臣曾國荃恭摺具奏伏乞

皇太后

皇上聖鑒訓示再此外水師各營暨陸軍之距金陵最近者防  
剿二年亦屬著有勞績文隨臣在安慶各營防守要地及辦理  
文案善後糧台諸事竭力經營已越三年其蘇皖印委各官有  
裨金陵軍事餉事者臣均當確切查明續行分案擇尤請獎合  
併陳明謹  
奏

密陳李元度等屈抑情形片

同治三年八月十三日

再密陳者

臣於元年閏八月欽奉

寄諭有人奏已革臬司李元度罪重罰輕飭

臣按照所參各情

查明具奏

臣以此案業經奉

旨交左宗棠查辦

臣

係原參之員例應迴避因函商左宗棠請

其詳查專奏

臣

遂未另疏覆陳亦以業經辦結之案苟大段平

允卽無庸瀆陳也今幸金陵克復大功粗成

臣

兄弟叨竊異數

前後文武各員無不仰荷

殊恩追思昔年患難與共之人其存者惟李元度抱向隅之感

其歿者尙有數人懷不瞑之恨

臣

均對之有愧不得不略陳一

二上干

奏稿卷二十六

聖聽李元度從臣最久艱險備嘗遠近皆知其十年守徽之役到郡不滿十日僞侍王大股猝至兵力未厚府城失陷臣奏參革職拏問其十一年援浙之役參案未結遽行回籍沿途飾報勝仗又不努力救杭臣奏參革職臣營議者皆謂臣後參援浙最爲允當前參守徽失之太嚴江楚等省之公論昭昭在人耳目臣雖知公論謂臣太嚴而內省尙不甚疚所最疚者咸豐六年之春臣部陸軍敗於樟樹江西糜爛賴李元度力戰撫州支持危局次年臣丁憂回籍留彭玉麟李元度兩軍於江西聽其飢困陷危蒙譏忍辱綏綏若避棄而不顧者此一疚也李元度下



筆千言條理周密本有兼人之才外而司道內而清要各職均可勝任惟戰陣非其所長咸豐五年自請帶勇十年夏閒臣又强之帶勇用違其材致令身名俱裂

文宗有李元度失劔可惜人才難得之嘆皆臣不善器使之過此又一疚也此二疚者臣累年以來每飯不忘茲因忝竊高爵拜

恩懷舊慚感交并此外臣尚有抱愧之端江忠源之將材本可大有爲於時人皆知長江水師創於微臣而不知其議發於江忠源咸豐三年江忠源在江西圍城之中一面奏請設立江面水師一面函請臣在湖南造船臣以無錢未遽造辦厥後江忠

源屢次催請救援

臣以無船無兵不能應之逮劉長佑江忠濟

馳援廬州

臣亦不能以一兵相助致廬州淪陷良將不竟其用

至今耿耿此亦一疚也原任甯池太廣道何桂珍以

上書房翰林出爲道員甫至店埠和春派三百人檄令馳援廬

江未及到防卽以救援不力奏參革職其事本極委屈厥後播

遷楚皖之交帶團剿賊飢餓艱危歷人閒未有之苦屢稟願隸

臣部下一雪忠憤臣亦無以應其求而遂其志卒以機事不密

爲叛人李兆壽所戕天下冤之李兆壽旋再降於滁州改名世

忠近年歸

臣節制臣因髮捻方熾苗禍又興不欲更添兵端又

察李世忠實無異志遂奏令解兵歸籍善全始終論

國家包容降將之道大體尙屬妥協論當時戕殺道員之慘百年猶有餘哀古之征伐爲匹夫匹婦復讐臣反不能爲良臣良友復讐何以對何桂珍於地下此又臣之一疚也咸豐六年臣被困於江西與湖南音問不通者八閱月軍心皇皇胡林翼奏派劉騰鴻普承堯吳坤修與臣弟曾國華四人帶勇六千馳援江西苦戰兩月師抵瑞州從此兩湖始通文報江西始有轉機實惟劉騰鴻兵力最勁功績最偉次年臣丁憂歸籍劉騰鴻與臣堅約敦請迅速回營得所依倚臣以陳情守制未還江西劉騰鴻因堅城不下餉項不繼諸事齟齬盼望臣往爲之主持而不可得抑鬱無聊終日逼城苦攻中礮而亡劉騰鴻忠勤堅卓

臣與駱秉章胡林翼福興等皆奏稱有名將之材乃該員以救  
臣而來臣反若委之而去不加護惜喪此烈士此又一疚也楚  
軍之興驍勇以塔齊布爲最雲南之畢金科次之二人皆能以  
匹馬竄出敵陣之背羣賊熟視而不敢逼六年二月臣部周鳳  
山樟樹鎮之敗惟畢金科一隊得完臣旋派令救援饒州畢金  
科長跪臣前稟稱孤軍千人不足以獨當一面願隨侍左右不  
欲遠離臣許以不久調回慰而遣之後在饒州屢次血戰以事  
機不順未及保獎又爲同事所排擠憤鬱飲泣七年正月戰死  
於景德鎮饒人憐之臣一言失信隕此長城嘗作一碑表其忠  
勇至今尙未刊立以猛將氣蓋一世旣不能善用以大顯其功

名而雲南梗阻萬里又不能寄金以優卹其父母此亦一疚也  
臣忝任將帥以愛惜人才爲職而歷年屈抑人才實已不少謹  
將私衷抱疚之端一一上陳李元度屢經臣處參劾未便再由  
臣處保薦應如何酌量錄用之處出自

聖主鴻裁江忠源何桂珍劉騰鴻畢金科四人可否由臣奏請  
加恩之處恭候

訓示理合附片密陳伏乞

皇太后

皇上聖鑒謹

奏

繪呈安徽地圖並長江圖說摺

同治三年八月十六日

奏爲遵繪安徽全省地圖並長江圖說恭摺進

呈仰祈

聖鑒事竊

臣

於同治二年十二月三十日接准總理各國事務

衙門咨稱該衙門具奏飭令各省繪具地圖一摺奉

旨依議欽此行知到

臣

伏查兩江統轄三省幅員遼闊當經

咨明江蘇地圖由李鴻章繪呈江西地圖由沈葆楨繪呈其安

徽地圖爲

臣

現在駐紮之所應由

臣

處繪呈至長江數千里近

年中外交爭關係最重自應另繪一圖均由

臣

衙門辦理旋經

札派分發補用知府劉翰清選用縣丞方駿謨綜理其事該二

員淹雅詳慎會同各屬地方官詳查將山川險阨村鎮關津水  
旱驛站計里詳繪遵照總理衙門所開二寸方格每格當五十  
里推測星度按方繪填計總繪安徽省圖一幅分繪府圖八幅  
直隸州圖五幅至各州縣零星村集自軍興以後多經焚燬詢  
訪纂難若憑志乘舊圖又恐歧誤失實因仿照康熙圖之例但  
將村鎮併入府圖不復另繪縣圖以昭核實其長江一圖從湖  
南巴陵縣洞庭湖口起至江蘇崇明縣海口止凡夫江面曲折  
道里袤斜磯港暗沙夷館關卡均經實測詳查逐一登載至輪  
船行江最畏擱淺其於江底淺深尺寸講求甚精現亦略仿其  
意另行貼說以便稽考謹將安徽各圖長江圖裝成全冊專弁

質遞恭呈

乙覽與各省所呈之圖未知體例相符否總理衙門原摺限半年內彙齊本應於七月初恭進因臣前有金陵之行遲誤月餘合併聲明所有遵繪地圖緣由恭摺具奏伏乞

皇太后

皇上聖鑒謹

奏



曾國荃請開缺調理摺

同治三年八月二十七日

奏爲據情代奏仰祈

聖鑒事竊據

臣

弟曾國荃咨稱同治三年七月二十七日奉

上諭據奏曾國荃於克城之後心血過虧困憊殊甚欲請回籍調理部勒散勇南歸求所爲善始善終之道等語該撫所見雖合於出處之道而於盡臣謀國之誼尙未斟酌盡善況遣散勇丁祇須分派妥靠之員沿途照料而現在江甯安慶等城均須督兵鎮守該撫正宜駐紮江甯安心調理一俟就痊即可幫同曾國藩分任其勞卽著曾國藩傳旨存問無庸遽請開缺回籍等因欽此跪誦之下悚感難名伏念國荃受

恩深重每於藎臣謀

國之誼亦嘗刻自惕勵以期仰荅

鴻慈於萬一祇以讀書太少未能斟酌盡善恭繹

聖訓益覺無地自容現奉

恩諭准在江甯安心調理復

諭以就痊後分任其勞國荃正當恪遵

諭旨趕緊醫治就痊於金陵一切善後事宜有關吏治民瘼者

加意講求藉資練習何敢稍耽安逸自外

生成惟一月以來延醫診視日進湯藥病勢有增無減緣怔忡

舊患起於心血先虧而成於憂勞過甚從前數月一發尚可支

持近則一月數發日增狼狽每至舉發之時粥飯不能下咽徹夜不能成眠始覺氣如奔豚上衝胸際漸至心神搖動頭暈目眩平地有顛仆之虞醫者云症由內傷必須靜養數月醫藥方能見功國荃自揣年力壯盛及早醫治得法尙可復元若此勉力支撐精神不能周到措置必至乖方思維再四惟有籲懇天恩賞准開缺回籍調理冀得早就痊癒國荃以書生從戎忝膺疆寄疊沐

殊恩曾未入覲

天顏跪聆

聖訓倘得病勢稍愈自當銷假入都泥首

宮門藉伸數年犬馬戀

主之忱至現在遣散勇丁已近萬人派員照料回籍其餘專俟  
餉到次第遣撤又派過皖北者一萬一千人交劉連捷朱南桂  
朱洪章統帶已於十二三等日過江馳援英霍其防守金陵城  
池及附近要隘萬餘人業已分段布置登陴守禦江浙四省指  
日可報肅清整修貢院九月可以完竣國荃別無經手事件惟  
冀回籍養病稍息仔肩等情懇請代奏前來伏查臣弟曾國荃  
春夏之交飲食日減睡不成寐臣曾陳奏一次然以一人而統  
九十里之圍師與羣酋悍賊相持自無安枕熟睡之理亦係將  
帥應嘗之苦臣尚不甚介意迨克城以後臣至金陵見其徧體

濕瘡仍復徹夜不眠心竊慮之近十數日不得家書詢之來皖差弁知其肝火上炎病勢日增竟不能握管作字幸值撤勇就緒軍務業經大定地方又無專責合無仰懇

聖恩俯如所請准會國荃開缺回籍調理一俟病體就痊卽令奏請銷假入都

陛見跪求

聖訓所有臣弟國荃因病籲請開缺緣由理合據情代奏伏乞

皇太后

皇上聖鑒訓示謹

奏

湖州廣德敗賊犯歙官軍截剿屢勝摺

同治三年八月二十七日

奏爲湖州廣德敗賊併犯歙南經官軍截剿屢勝恭摺馳陳仰

祈

聖鑒事竊自湖州克復賊眾數萬糾合廣德餘黨分路出竄業經蘇浙各軍兜剿窮追狼狽已甚其衝過徽甯境內者八月初一日經甯國守將劉松山迎擊於錢邨鋪收降卒常宇安等四千餘人悉行遣散旌德守將易開俊聞警拔營旋向板橋繼進賊之後隊乃由老竹嶺轉竄歙縣之南鄉初七日徽州守將唐義訓自杞梓里進軍中嶺易開俊亦自板橋進軍山陽坑合隊夾擊大敗之斬擒三千有奇餘賊翻過六甲嶺遁向瀟安一路

初九日探報老竹嶺有續到之股爲僞幼英王陳逆僞幼忠王李逆及僞幼孝王等人數尤眾易開俊率隊疾進先令歐陽廷易致中喻先達三路馳擊中路戰不數時復督蕭章開曹義勝何作霖三營從叢箐中橫出截賊賊不稍卻喻先達易致中歐陽廷何作霖等大呼陷陣立殪前鋒賊始潰走我軍沿途跟剿斬斃近千解散盈萬餘賊聚於六甲嶺頭易開俊於次日分所部爲六路撥開榛莽蟻附上升羣賊一見卽奔各軍踰嶺壓下殺賊又以千計直追至畢家園而返十一日易開俊進紮蘇村駐軍少憩十四日督隊向胡須嶺履勘地勢適與賊遇令歐陽廷易致中鄭開武爲前茅自率馬隊親兵應之令蕭章開爲左

翼喻先達爲右翼三路併進擒斬無算賊仍遁出嶺外此八月  
初七至十四等日易開俊一軍疊擊山陽坑六甲嶺胡須嶺竄  
賊獲勝之情形也維時賊之遁向淳安一路者已抵威坪爲浙  
軍所扼將欲回竄歛境唐義訓飛飭馬登富宋光隆穩守深渡  
自率左俊逸王品高等五營於十四日馳至昌溪適見賊紛紛  
過嶺比及引軍擊退又報賊以大股突竄江村片股繞出約坑  
佛嶺一帶將在定潭橋出口唐義訓遂令王華雲蔣信玉等赴  
豹嶺扼堵唐義謨左俊逸等赴佛嶺扼堵并督小隊親往深渡  
而賊已由鎮口渡河急派馬登富宋光隆繞河橫擊賊之中槍  
墮水者不少時唐義謨左俊逸等正在佛嶺而出約坑合軍猛



勦截賊兩段一面堵住過河之賊一面迎敵鎮口衝出之賊相持數時賊始受創退往江村王華雲等亦在豹嶺腳大有斬獲而還是夜雨甚賊冒雨涉水由小川搶渡我軍節節截勦戰至嚮晨唐義訓分軍抄出鎮口後路仍親率數營斜越深渡上游賊見我軍過河大駭而奔折向黃備一帶又爲金國琛步隊所襲拋棄輜重略盡十六日唐義訓先派各營面面設伏以待賊賊果向鎮口悉眾竄出上下五六里旗幟層列鳧水爭渡猶未盡濟也不料我伏軍突出擊之既濟之賊半蹙入水而未濟之賊欲遁無路馬登富蔣信王等從陸路環擊浙軍礮船亦從水路駛至賊乃伏地乞撫願效前驅中有廣賊千餘人誓死不降

又經我軍直前痛剿斬馘數百惟游擊唐遠崑力戰死之是役也殲大小酋目九人降者數千人僞幼孝王胡逆並死於亂軍之中此十四五六等曰唐義訓一軍在豹嶺佛嶺鎮口等處堵剿大勝之情形也臣查湖州廣德各賊傾巢敗竄勢將由徽入江以圖生路幸易開俊唐義訓等在歙縣東南併力堵遏俘斬降散爲數甚衆再得一二勝仗可冀就地殄滅不至貽患江西實屬有裨大局在事出力員弁應俟皖南全境肅清後彙懇

恩施花翎參將銜游擊唐遠崑擊賊陣亡應請

敕部照參將例從優議卹所有徽甯防軍截剿竄賊疊獲勝仗

緣由謹會同督辦江西皖南軍務陝甘督臣楊岳斌由驛五百里具奏伏乞

皇太后

皇上聖鑒訓示謹

奏

近日軍情片

同治三年八月二十七日

再近日軍情江西侍逆等股竄擾南安水城江忠朝王文瑞兩軍趕到尙未擊退楊岳斌已抵贛州若南贛不清恐難遽赴甘肅湖州廣德之賊經浙軍徽軍層層追擊縱有零股竄入江西亦不過數千人得鮑超劉典等軍迎剿北路當易於肅清皖北之英山霍山一片賊氛蔣凝學雖屢獲勝仗而糧路尙屬梗塞臣現調劉連捷朱洪章朱南桂等率金陵萬餘人由桐城進剿英山調李榕王可陞何紹彩三軍八千人由六安進援霍山有此兩枝大兵皖北亦易剿辦臣本擬俟全皖肅清再行移駐金陵因臣弟曾國荃病勢增劇下游無人主持定於九月初間起

程駐紮江甯  
驚治貢院工程據稟可於九月一律完竣  
臣到江甯親往驗工如實無草率之處再行奏請  
簡派試官以昭慎重理合附片陳明伏乞

聖鑒謹

奏

截停淮北餉鹽設法整理以復舊制摺

同治三年八月二十七日

奏為遵

旨截停淮北餉鹽設法整理以復票鹽舊制恭摺仰祈

聖鑒事竊

臣承准議政王軍機大臣字寄同治二年十一月十

八日奉

上諭本日據戶部奏淮北票鹽提充軍餉請分別截留以保正課一摺亦因苗逆伏誅皖徐平靜淮北銷路漸通亟應將餉鹽分別截留以挽頽綱而裕正課著曾國藩嚴飭鹽運司忠廉設法遵照辦理戶部摺並著鈔給閱看等因欽此伏查淮北鹽務自前督臣陶澍改行票鹽意美法良商民稱便果能率由舊章

行之百年不敝無如軍興以後運道之通塞靡常銷數之暢滯  
無定鹽旣不能如額運售課卽不能按綱造報拖延套搭已覺  
年不如年然未辦餉鹽以前票販雖曰形竭蹙而尙能勉力從  
公池商雖難免偷漏而未敢任意售私迨軍營提鹽抵課變易  
舊規營員日出於其塗商販遂聞而卻步李世忠部下赴垣領  
鹽尤屬桀驁一不遂欲百般恐嚇甚至因棧鹽不足下場自緹  
一營開端各營效尤護私夾私之弊遂至不可窮詰現在李世  
忠業經開缺回籍其部下兵勇亦皆遣散當此淮甸澄清自宜  
恪遵

聖諭將餉鹽截停招集新舊票販照常請票運鹽完納現課出

湖銷售臣旁咨博訪參考成法核議新章約有必須停止者三  
急宜整理者四請爲我

皇上陳之漕臣以清淮防費支絀先令場商每包捐鹽五斤每  
引共二十斤旋因逐包捐繳諸多未便由海分司詳改每運鹽  
百包帶繳五包其應完課銀及售出鹽價雖經吳棠奏明作爲  
清淮軍需但錙銖而取之瑣屑而派之殊非政體所宜此必須  
停止者一也徐州係山東引地前因捻氛梗阻東引未能到岸  
經督辦徐宿軍務田在田奏准借運北鹽劃收東課原係暫時  
權宜之計行之日久流弊滋多採買則私自赴場售銷則旁侵  
皖界刻下東引業已通行徐民無虞淡食不能再託借運之虛



名貽侵銷之實患此必須停止者二也北鹽向有淨鹽毛鹽之分已改細者爲淨鹽未改細者爲毛鹽皆須納課方准出湖近來私梟勾串營弁朋販毛鹽結隊橫行連橋闌越堵之嚴則營員出而包庇緝之疏則官引盡被占銷此必須停止者三也夫推鹽之法革其弊而利自興餉鹽停則強封害販之弊除捐鹽停則科斂病商之弊除借運朋販之鹽停則引界混淆營私充斥之弊無不除臣所謂整理之四端蓋亦就諸弊旣去因勢利導耳淮北綱引前係奏至戊午綱爲止今於五月初八日接開已未新綱惟兵燹以後戶口大減斷不能銷四十六萬引之數應循照近年奏案先辦正額二十九萬六千九百二十八引每

引例收報部正課一兩五分一釐雜課二錢又外辦經費四錢  
倉穀河費鹽捕營各一分此外如團練壩工緝費號項等款名  
目太繁一概刪除以紓販力此現籌整理者一也近來軍餉皆  
賴鹽釐接濟勢不能概行裁撤而長淮處處設卡商販視爲畏  
途且從前各卡總計每包約須完釐錢二千餘文爲數過重自  
應大加核減今擬仿淮南總收分解辦法歸併兩處自西壩出  
湖先在五河設卡每包收釐錢五百文運赴上游再於正陽關  
設卡每包收釐錢五百文他卡只准驗票不准重抽統由臣選  
派委員駐卡經理蓋非減釐不足以輕本非裁卡不足以卹商  
此現籌整理者二也淮北解餉原案向以十成分攤臨淮軍營

分四成滁州李營分四成安徽撫營分二成今臨滁兩營業已  
分別裁并自可將該兩營舊有之餉改撥金陵一軍稍解燃眉  
之急惟漕臣停止捐鹽亦應量予撥濟以資貼補嗣後所收課  
釐臣已咨明吳棠喬松年應仍以十成分派臣營派五成撫營  
派四成漕營派一成論兵數則小有裒益論舊例則無甚更張  
此現籌整理者三也北鹽每引例定正鹽四百斤分細四包每  
包連鹵耗重一百十斤近來棧鹽出湖皆在西壩改細大包重  
一百二三十斤不等以省運腳及按包抽釐之費換包後鹽票  
不符叢生弊竇臣已嚴申禁令不准改細大包並於例給大票  
外將每船裝鹽包數亦仿淮南之例填給艙口清單庶鹽與票

符可杜就重而避輕不致以多而報少此現籌整理者四也以  
上各條係就戶部原奏及御史劉毓楠之條陳悉心參酌力挽  
近年之秕政悉復曠昔之成規而又恐積弊已深一旦改收現  
課各販不甚踴躍更議輔以官運照商販一律辦理以示倡導  
淮北近年以來綱法紊亂開綱既無定期奏銷亦無定限目下  
新章既定臣嚴飭運司督同海州分司廣爲招徠源源認運仍  
限一年造報奏銷以符定制但例銷北鹽口岸疊被苗捻蹂躪  
之後不但煙戶凋零人民稀少且未經開綱以前存積餉鹽捐  
鹽販鹽爲數不少舊鹽之占壓太多新鹽之售銷難速勢有必  
然又皖之潁六廬鳳豫之信羅光固逼近捻氛軍情變幻刻刻

可憂課項能否如額收足奏銷能否依限造報未敢信有把握  
其五河正陽關所收鹽釐將來自當隨同正課一并報部以重  
款項惟因餉需緊要此時所收鹽課只能支應軍需未能先運  
京餉私衷耿耿抱疚良深臣惟有督飭署運司忠廉殫盡血忱  
實力經理以仰副

皇上整飭離綱之至意所有截停淮北餉鹽設法整理緣由理  
合恭摺具奏伏乞

皇太后

皇上聖鑒訓示再戶部飭查歷年各營抵餉數目已飭運司逐  
細確查造冊詳送容俟送到清冊另行咨部合並聲明謹

奏

江南貢院工竣請放考官摺

同治三年九月十一日

奏爲江南貢院建修工竣定於十一月舉行鄉試懇請  
簡放考官仰祈

聖鑒事竊江南鄉試自咸豐九年在浙江借闈特開

萬壽恩榜并補行乙卯正科後尙有戊午辛酉壬戌及本屆四

科歷經奏請展緩辦理逮本年六月江甯省城克復臣親勘貢

院幸尙未全毀當卽鳩工庀材飭派記名臬司黃潤昌監視興

修於八月十三日奏陳大概旋據該員以要工完竣繪圖呈驗

臣於九月初一日自安慶起程初七日舟抵金陵初九日至貢

院查驗工程所有主考監臨提調監試房官各屋膳錄對讀彌

封供給各所新造者十之九修補者十之一號舍一萬六千餘  
間新造者十之一葺補者十之九又因江南人文薈萃向慮號  
舍不敷酌就闢外圈入隙地以備將來添建號舍之用臣逐段  
勘驗現僅號板未全牌坊及油飾未畢約計九月二十日前一  
律完竣工堅料實煥然一新兩江人士聞風鼓舞流亡旋歸商  
賈雲集現在已通飭各屬出示曉諭定於十一月舉行鄉試江  
南監臨向係江蘇安徽兩省巡撫分科輪辦本屆甲子及補行  
戊午各正科係屬江蘇輪值之年臣已咨明撫臣李鴻章請其  
屆時前來入闈辦理監臨事務其提調監試各官向例於江安  
兩省藩臬道府大員中調派內簾十八房則於科第出身實缺



州縣中考充如實缺人數不敷卽於兩省候補之卽用大挑揀發各班挑選現值地方多係新復實缺人員寥寥無幾所有內外簾各執事應由監臨官循例分別調取至江南正副考官向章八月鄉試係於六月二十二日

簡放主考禮部於二十日進本此次十一月舉行鄉試似應於九月二十二請

旨簡放考官向章江南主考由徐州臨淮滁州驛路行走目下滁州等驛尙未整應改由清江浦揚州馳驛南來以免遲誤前此咸豐九年借用浙闈舉行已未

恩科並補行乙卯正科安徽取中正額因皖北赴考人數較少

奏准先中六成酌畱四成計兩科存畱中額三十六名俟皖北肅清後於下科鄉試補中目下英霍賊退全皖將次肅清應否將所畱三十六名於本科補中之處請

旨敕下禮部核議知會正副主考查照辦理所有貢院工竣舉行鄉試請

旨簡放考官緣由恭摺由驛五百里馳奏伏乞

皇太后

皇上聖鑒訓示謹

奏

皖南北兩岸肅清摺

同治三年九月二十七日

奏爲官軍驅賊出境皖南北兩岸肅清恭摺馳陳仰祈

聖鑒事竊自鄂賊圍撲英山皖軍戰守逾月經喬松年節次奏  
報浙賊併犯徽州各軍截剿屢勝亦經臣於八月二十七日奏  
報在案方湖北髮捻大股由麻城入羅田勢漸東下六安守將  
蔣凝學率隊進剿兵次金家鋪立營甫定爲賊所困我軍伺隙  
一擊敗之賊乃轉趨英山圖襲縣城蔣凝學裹糧馳援又卻之  
城池遂以得完厥後蘄水月股之賊羅田續至之賊英山受創  
之賊愈聚愈眾環布長圍日逼城壘糧運文報一時俱絕蔣凝  
學忍飢誓眾屢戰獲勝先後俘斬解散者以數千計賊知不可

復逞於九月初間悉數退竄楚境適英翰郭寶昌擊敗霍山之賊由六安以達英山蔣凝學奉湖廣督臣之檄亦卽由英山赴援羅田而賊之徧擾蘄水蘄州廣濟黃梅者正入太湖西境聞劉連捷朱南桂等軍已抵太湖遂悉數退竄鄂疆此皖北暫就肅清之情形也賊之由浙入皖而延擾徽郡者易開俊迎擊於山陽坑六甲嶺胡須嶺等處唐義訓金國琛截擊於豹嶺佛嶺黃備鎮口等處臣前疏業已詳陳賊自鎮口一敗死者降者散者棄老弱輜重而遁者十之六七唐義訓慮餘賊尙圖鋌走率所部馳至草市遏之金國琛亦要截於小溪賊乃踰歙嶺而逸唐義訓令左俊逸出連嶺王華雲出白際嶺宋光隆出馬金嶺

跟蹤追剿仍自將兩隊以繼各軍之後賊聞徽軍出嶺足不停  
趾急走遂安竄入章村郭村一帶左俊逸王華雲宋光隆追及  
郭村斬三百餘級解去千餘人金國琛亦自小溪逐賊而來賊  
橫竄馬石橋出豐口小路陷開化走華埠據報漏逸而西者不  
過數千此皖南全境肅清之情形也臣查十年以來安徽南北  
兩岸受禍最烈今幸仰仗

天威全皖粗安予黎漸有還歸之望然湖北之賊尙趨重於蘄  
水廣濟等縣臣方添調各軍扼堵太湖潛山宿松英霍等處是  
皖北目前之肅清未可深恃皖南之賊竄入江西節節皆有重  
兵餘匪當竄楚粵不能復擾皖境所有皖南諸軍如易開俊唐

義訓劉松山金國琛等防剿多年艱苦備嘗應卽籲懇  
恩施以昭激勸提督銜安徽壽春鎮總兵易開俊可否  
交軍機處記名遇有提督缺出請

旨簡放署安徽皖南鎮總兵唐義訓可否開復革職畱任處分  
并簡補皖南鎮實缺提督銜記名總兵劉松山可否

簡放實缺並給予一品

封典前布政使銜湖北安襄鄖道降補同知金國琛可否先行  
開復道員原官其餘出力員弁可否彙入擊退竄賊各案內容  
臣開單奏保均出

皇上鴻施所有官軍驅剿竄賊皖境肅清緣由謹會同督辦江

西皖南軍務陝甘督臣楊岳斌安徽撫臣喬松年由驛五百里具奏伏乞

皇太后

皇上聖鑒訓示謹

奏

報銷皖省抵徵摺

同治三年九月二十七日

奏爲皖省改辦抵徵彙報收解簡明總數恭摺仰祈

聖鑒事竊安徽與湖北連界自楚師入皖疊復郡邑各州縣支應兵差款項無出每立公局按畝捐錢以紳士經理其事民捐民辦從不報銷日久弊生縣官不能過問紳士亦互爭利權徵求無度百姓苦之咸豐十一年八月安慶省城克復臣國藩督同司道出示停止畝捐稍蘇民困旋因募兵增餉大舉東征勢不能不重累閭閻再籌經費第以兵革之後冊檔全失丁漕混淆遽徵錢漕竟無下手之處當經善後總局議以畝捐之法參用正供之意查明各處熟田按畝捐錢四百文給予縣印串票



以抵正賦名曰抵徵一切收解動用官爲報銷兼設紳局襄辦  
清查糧畝仍不得稍侵利權於同治二年二月詳辦在案當時  
初易畝捐而爲抵徵取之有制民無重徵之慮操之自上紳無  
侵蝕之權行之二年百姓既欣然樂從軍餉大有裨益惟抵徵  
雖與正供無異而未分款目難入奏銷且查畝略有頭緒卽宜  
仍還舊章本年軍事大定臣國藩又於春間札飭一律開辦丁  
漕以復舊制所有同治元二兩年安徽各州縣收過抵徵項下  
銀米錢三款自應專案作正報銷計銀一兩作錢一千四百文  
核算凡撥解司庫者銀錢併計共錢三十三萬一千三百二十  
九串零應由藩司報銷凡撥充糧臺軍餉者銀錢併計共錢六

十二萬三百二十六串米九千四百五十石應由糧臺報銷凡撥歸善後局者銀錢併計共錢七千八百串合之地方州縣供應兵差均歸軍需造冊併入藩司衙門報銷據藩臬兩司會詳請奏前來臣等查安徽辦理抵徵係臣戶藩與前撫臣李續宜先後會商其時議定由李續宜主稿會奏厥後李續宜患病丁憂久未銷假旋皖而唐訓方任內日在危險之中亦未出奏以皖省抵徵係由督署始終主持自應由臣國藩具奏梗概仍飭布政司核明各屬實征完解各數造冊由臣松年咨部查核其三年以後開辦丁漕亦由臣松年屆時奏銷所有皖省改辦抵徵兩年收解簡明總數理合會摺具奏伏乞

皇太后

皇上聖鑒訓示謹

奏

遵

旨馳赴皖鄂交界督兵剿賊摺

同治三年十月二十日

奏爲遵

旨馳赴皖鄂交界督兵剿賊恭摺仰祈

聖鑒事竊臣承准議政王軍機大臣字寄同治三年十月初八日奉

上諭現在江甯已臻底平軍務業經戡事卽著曾國藩酌帶所部前赴皖鄂交界督兵剿賊務期迅速前進勿少延緩第恐曾國藩之兵由東路進偏賊必避兵西竄武漢一帶防守亦關緊要官文俟曾國藩到後卽可回駐省垣會同吳昌壽妥籌防範並將各營餉需源源接濟毋令缺乏僧格林沁現駐黃岡之上

巴河第恐深入楚境難保賊匪不伺隙竄擾北路著酌量情形扼要駐紮力固豫疆賊或北竄卽著督率馬步迎頭夾擊以期聚而殲旃僧格林沁官文曾國藩均係威望素著似此三面扼紮必能將此股賊匪悉數殲除剋期肅清至江南甫經肅清所有撫輯地方一切事宜均須妥爲籌辦卽著李鴻章前赴江甯暫署總督篆務曾國藩俟李鴻章到後卽行交代起程等因欽此適值李鴻章前來江甯辦理監臨事務十月十七日馳抵金陵臣與之面商湘勇多勦髮匪少遇擒匪不若添調淮勇熟於潁壽之程途兼悉擒匪之伎倆湘淮各軍三路并進更資得力因會檄調劉銘傳李鶴章等統率淮勇渡江而北隨臣西上進

勦皖鄂之賊臣自咸豐四年躬親矢石屢次敗挫厥後十載久未親臨前敵卽元年秋間大疫羣賊紛乘會國荃被圍四十六日鮑超絕糧三日臣俱未親行援救本年屢奉

諭旨飭臣督攻金陵臣亦未親往圍攻非膜視也自揣臨陣指揮非其所長不得不自藏其短俾諸將得展其才此次臣若自赴楚界未必有益而與僧格林沁官文同駐蘄黃四百里之內以

欽差三人萃於一隅恐啟賊匪輕視將帥之心擬仍駐紮安慶六安等處派劉連捷等直入黃州各屬聽候官文調遣凡臣所能調者官文皆能調之臣部之名位勛勞以鮑超爲最著

諭旨詢派督辦軍務臣尙奏請由沈葆楨和衷調度豈有官文督楚十年反不能調楚師之理倘有不遵調度惟臣是問力戒將士畛域之見以敦江楚一家之誼務將此股髮捻悉數掃除使皖鄂一律肅清庶幾仰慰

宸廑於萬一除交卸督篆起程日期續行具奏外所有遵

旨馳赴皖鄂交界督兵勦賊緣由恭摺由驛五百里覆奏伏乞

皇太后

皇上聖鑒訓示謹

奏

密陳才力竭蹶難勝重任片

同治三年十月二十二日

再密陳者

臣

才力竭蹶不堪肩荷艱鉅曾於元年八月十月二

年四月三次具奏本年三月又因手足搐瘳請假調理厥後金

陵倖克如釋重負意謂可心舒而體泰乃數月以來精神反遜

於前左手搐瘳如故間或兩耳重聽歷數時而不止自度蒲柳

早衰萬難再勝重任楚軍出征過久官秩日高漸成強弩之末

臣屢次致書李鴻章謂楚勇暮氣將乘必宜多撤淮勇銳氣方

盛不可輕撤一俟皖鄂肅清

臣

卽專疏籲懇

天恩請開各缺調理病軀所有

欽差大臣關防屆時派委妥員齎京恭繳

臣

亦不敢置身局外



仍當效力行閒將經手事件次第清理一則用去兵餉數百萬  
雖

恩旨准免造冊報銷仍須督同局員逐款核算開具清摺分別  
奏咨一則現存勇丁七萬人除酌畱數軍外均須籌備欠餉分  
批裁撤又有降將洪容海古隆賢等七起李世忠之舊部一起  
尤須妥爲安置一則新設長江水師立營分汛籌餉修船皆須  
逐層區畫此數者係臣分內應了之事計非二年餘不能料理  
就緒臣擬擇濱江僻縣駐紮力疾經營不敢稍涉疏懈除俟勘  
平皖鄂恭摺具  
奏外謹先密陳下悃伏乞

皇太后

皇上聖慈垂鑒謹

奏

交卸督篆仍回本任摺

同治三年十一月十八日

奏爲恭報

微臣

交卸督篆并遵

旨仍回本任各日期仰祈

聖鑒事竊

臣

前奉馳赴皖鄂督勦之

命遵經檄派各軍並將擬駐安慶六安等處就近調度情形於

十月二十二日具陳大概在案拜摺後飭令李鶴章輕舟回營

照料劉銘傳周盛波刻日拔隊渡江嗣據周盛波呈報定於十

一月初六初八等日率所部九營由溧陽先後起程劉銘傳亦

定於十二日率所部十六營由廣德建平陸續起程

臣

將地方

經辦事宜略爲部署先於初三日交卸兩江總督篆務料簡西

行續奉

寄諭據僧格林沁等先後奏報蘄水獲勝成大吉軍解圍賊竄英山等處經僧格林沁督師進剿擒獲首逆多名降者十餘萬眾昨又據喬松年奏報扶逆陳德才自戕髮逆剿除淨盡皖省一律肅清是楚皖近日軍情較之半月以前大不相同現在楚境餘賊由黃孝竄德安一帶逆數無多楚軍可敷剿辦曾國藩又派劉連捷等軍歸官文調遣計日定可廓清著卽飭令劉連捷李鶴章劉銘傳等軍迅赴黃州德安等處遇賊卽擊如賊趨皖豫並令各軍分投防剿通力合作爲一勞永逸之計曾國藩卽可無庸前赴安慶亦無須交卹督篆仍駐紮金陵妥籌調度

等因欽此查鄂中髮逆雖經全數殄滅而捻逆退竄德安一帶則由鄂而豫而皖均係往來熟徑劉連捷等軍宜以黃州上巴河爲老營凡黃州八屬有警卽令分隊馳剿并添派吳坤修前往料理營務劉銘傳等軍宜以三河尖固始爲老營凡皖豫交界有警卽令相機防剿仍飭派李鶴章同往料理營務有此兩枝勁旅庶可騰出湖北本省兵力專顧德安襄陽等處以爲通力合作之計頃准李鴻章將總督關防派弁齎送出闈卽於十一月十七日接篆照常任事俟此間科場完竣諸務就緒擬仍乘坐輪舟駛赴安慶黃州一次面囑諸將妥籌防剿迅掃上游餘孽以慰

宸廩所有遵奉

諭旨交卸回任各緣由謹繕摺由驛奏報伏乞

皇太后

皇上聖鑒訓示謹

奏

欽奉 諭旨分條覆陳摺

同治三年十二月十三日

奏爲欽奉疊次

諭旨恭摺覆陳仰祈

聖鑒事竊自本年春夏以來江皖兵事尙亟凡先後

寄諭事件有關調度攻戰者業經隨時詳奏馳慰

宸廑厥後金陵克復百緒繁興計秋冬奉

旨垂詢之事未及具覆者尙有數端謹分條爲

皇上敬陳其略伏讀

諭旨飭派曾國荃前往明太祖孝陵致祭其有應行修葺之處

飭臣一面查明情形迅速奏聞一面督飭地方官酌量興修等

因查孝陵衛在江甯省城東北爲昔年向榮等駐軍之所十年兵燹不特饗殿全毀卽圍牆碑亭亦已蕩然無存仰荷

聖慈優禮勝朝遣官致祭遵卽移會曾國荃於九月二十日按

照會典謹備祭品前往行禮臣亦嘗往展謁一次察看明陵毀

傷過甚修理維艱旋委善後局司道勘估工程據稟匠人不甚諳練約略估計需銀在十二萬兩以外金陵應修之工極多且鉅六月十六破城時地道缺口及南門城樓甫經修竣頃又於十二月初七日挑浚秦淮河此三處皆用營中勇夫分段賦工然需費已二萬有奇此外城腳地道二十餘處明春有頽圯之虞目下無此鉅款興修卽明陵要工亦尙無款可撥不能不稍



緩數月再行籌辦

諭旨有云會國藩咨送李秀城供詞一本昨議政王軍機大臣呈進均已覽悉末段所載該逆宛轉求生乞貸一命請招降江西湖北各賊言招降事宜有十要洪逆有十誤均歸刪節飭將原供仍詳細鈔錄咨送軍機處等因查李秀城原供撫拾數萬言雖多可信之處而自誇戰功與各路軍報不甚符合其中反覆重沓獻諛乞憐無非圖延旦夕之一命臣竊謂該逆斷無赦理江西湖北各賊股亦斷無憑該逆尺書全數就撫之理是以將其支詞妄語概行刪節既奉諭旨查詢茲將其十要十誤及其他語補鈔進

呈以備考核

諭旨又因李秀城供詞內稱張國樑遺骸係伊用棺木收埋在丹陽寶塔根下飭臣傳知曾國荃派員尋覓卽飭該故員家屬認領改葬等因遵經恭錄轉移曾國荃派員往查日久無獲臣又續派副將朱士達守備施占琦前往丹陽東門外附近寶塔之皖江會館三義閣一帶徧詢該處居民並寺僧寶華僉稱從前寶塔下并無墳墓咸豐十年賊擾後始有墳墓一坵本年九月曾國荃派員尋訪後又經馮子材委員訪求張國樑忠骸至此啟視不符重爲加工封築此外別無一墳更無一能知之者旋據江西縣丞王丙燁稟報伊弟丙椿在張國樑部下同時戰

歿丙椿隨身長夫現在逃至江西頗能述當日死事情形臣已批令飭派該長夫迅至金陵以憑詰問張國樑收埋下落尙不知有無端倪

諭旨又詢江北之餉計可騰出若干飭臣等查明實在數目以一半分解甘省以濟要需以一半分濟皖軍前敵如甘省待用萬分緊迫卽將此有著之款儘力籌撥不必拘定一半之數並著妥議章程迅速具奏等因臣查江北糧台進款約有數大宗曰釐金曰漕折曰地丁雜稅蘆課曰運庫月協二萬曰統捐曰花布行棧按畝各捐本年八月以前每月所入計十萬兩有奇自奉准部文畝捐行棧捐先後停止釐捐局卡分別裁併而統

捐一款明春勢難再辦地丁蘆課等項現經藩司衙門詳請畱作旗綠各營坐餉之需另案會奏漕折一款本年已奉部駁不准截畱旋經富明阿奏准暫畱借充遣撤各勇之用仍須籌款解還舍此數者統計來年騰出有著之款惟運庫協餉及江北釐捐二宗每月不過五萬兩臣擬俟揚州防勇撤竣後先提江北四五箇月入款儘數解部抵還本年所畱漕折此後按月以三萬兩撥赴甘省以二萬兩畱供皖軍仍俟皖軍一經裁撤卽將此項分成之餉併解甘肅以濟要需是否有當恭候

訓示遵行

諭旨又以池州府知府范先謨臣隨時悉心察看如始終不

能勝任卽行據實參奏毋稍遷就等因臣當卽札飭藩司密爲  
訪察旋據稟該員范先謨由安徽候補直隸州委署池州府篆  
循分供職尙無別項劣跡學政朱蘭在池州考試月餘臣細加  
詢訪亦無貶詞惟係佐雜保升之員器識未免狹小而署任已  
滿一年辦事殊少振作未便稍涉遷就臣現函商撫臣喬松年  
卽將該員撤回調省仰副

聖主澄敘官方之至意以上五條皆奉

諭飭查之件謹分晰條列繕摺由驛馳奏伏乞

皇太后

皇上聖鑒訓示謹

奏

奏稿卷二十六

四

查覆淮北鹽務摺 同治三年十一月十三日

奏爲遵

旨確查御史劉毓楠條陳淮北鹽務恭摺覆陳仰祈

聖鑒事竊

臣於同治二年十二月十五日接准部咨議覆御史

劉毓楠奏淮北引滯課絀請設法整頓一摺同治二年十一月

初七日具奏本日議政王軍機大臣奉

旨依議欽此恭錄到

臣

伏查該御史所奏六條除汰冗員一條

業經戶部奏覆所需廉俸無多毋庸裁缺外他如裁釐捐以紓  
販力禁私鹽以暢官引減經費以重公項定場鹽之價以杜居  
奇濬河道之淤泥以利挽運洵於北鹺確有所見 臣前議淮北

新章卽將該御史所奏詳加參酌弊之應革者逐加釐剔利之  
應興者徐圖規復至所稱厯任海州運判到任必先核減鹽價  
恐嚇商民迨至賄賂滿囊始行詳覆舊制又河費捐款經十餘  
年之久已逾數萬商販屢請挑河該運判置若罔聞等語果如  
所奏則商民任其簸弄公款難免侵吞必須遵照部議派委大  
員澈底根究方足以警官邪本年正月江甯藩司萬啟琛自安  
慶起程赴任臣卽札派該藩司會同署運司忠廉秉公詳查旋  
據該藩司等派員密訪弔卷確查悉心勾稽按款詳覆正在核  
奏間接到部文內稱御史劉毓楠條陳淮北票鹽一摺內如裁  
釐捐禁私鹽減經費三條現據兩江總督奏明分別裁減毋庸



再行籌議尙有定鹽價通河道兩條未據查覆應卽查照前奏  
指詢各情迅速根查等因臣查場價之長落向視壩銷之暢滯  
銷暢則販利較厚自宜酌增場價以貼池商銷滯則販本有虧  
又宜酌減場價以貼票販譬諸百貨有盈缺市價卽有低昂從  
前稟鹽舊章池商應得之鹽價駁價每引共計九錢軍興以後  
路梗銷疲咸豐四年卽經前任海分司詳明減爲七錢厥後續  
有增減之案經萬啟琛等查明均係稟詳運司因時制宜尙非  
憑空簸弄惟向章鹽價係繳分司衙門轉發池商嗣因餉需緊  
要往往將鹽價墊解軍餉以致未能按期給發池商益形苦累  
自丙辰綱起改爲由販自付不由分司收放旣無挪墊之虞亦

無剋扣之慮池商運鹽一引可得現價七錢足資轉輸本年新  
綱亦係照此辦理臣又將池商捐繳之河費團練船工等項概  
予刪除商情皆稱允服又查淮北河費向係票販與池商每引  
各捐一分咸豐四年以後販力竭蹙經前任海分司詳明將票  
販帶繳之一分裁去僅畱池商一分從前每綱運鹽四十六萬  
引照額收足祇收銀四千六百兩近年銷數益滯捐款益微歷  
綱並無繳足之年場河亦有興挑之案卽倉穀勇糧等款經萬  
啟琛等逐細確查皆出因公動用尙無侵吞情弊本年新綱列  
征票販河費一分臣已飭令專款存儲自當隨時委勘擇壅塞  
淺阻之區爲疏濬深通之計又飭海州分司將歷年所收外辦

雜款按綱按任造具支用清冊詳報由臣逐款核銷以昭核實  
所有遵

旨確查緣由理合恭摺覆陳伏乞

皇太后

皇上聖鑒勅部查覈施行再戶部奏催淮南招商配引章程現  
在淮南鹽務悉照臣本年正月奏定之案辦理漸有起色此時  
無庸另議更張一俟川私稍衰楚岸稍暢卽當酌增鹽課臣已  
於十月二十七日奏覆合併聲明謹

奏

豁免皖省錢漕摺

同治三年十二月二十八日

奏爲查明皖省各州縣應徵錢糧雜稅分別被災輕重酌擬蠲免年分請

旨遵行恭摺仰祈

聖鑒事竊江蘇安徽兩省歷年積欠錢糧及雜稅等項於本年七月二十二日經戶部奏奉

諭旨截至克復之日爲止著曾國藩李鴻章喬松年各飭藩司分別查明彙奏請豁等因欽此仰見

聖主痌瘝在抱念切民瘼欽感曷任伏查江蘇被兵地方應蠲錢漕業經李鴻章隨時會摺奏辦安徽八府五十九州縣陷於

粵逆者十居其七破於擒匪叛練者十居其三蹂躪情形較他  
省爲尤甚遵經督飭前藩司馬新貽會同臬司何璟糧道王朝  
綸詳查去後旋據查覆皖南徽甯廣等屬兵戈之後繼以凶年  
百姓死亡殆盡白骨徧野此受害最重者也皖北滁全來天盱  
等屬爲豫勝營駐兵之地亦爲羣賊往來之路淮北鳳潁泗等  
屬苗擒出沒恣意焚殺至再至三此皆受害較重者也沿江安  
池太廬和六等屬多係水鄉又遭兵燹十年之久此亦受害次  
重者也溯查咸豐十年閏三月奉上諭懷遠鳳陽五河各縣及臨淮鄉應徵咸豐七八九十等年  
錢漕均著照部議概予豁免十一年十二月奉

上諭江蘇安徽浙江三省失陷郡縣明年錢糧一概蠲免又先後奉准部文豁免咸豐九年以前積欠錢糧漕米蠲免同治二三兩年安徽蒙亳等處錢漕本年四月間戶部議將曾經失守地方收復以前積欠錢糧全行豁免均蒙

俞允此次續奉

恩旨自應欽遵併案辦理惟安徽用兵十餘年通省淪陷殺戮之重焚掠之慘殆難言喻實爲非常之奇禍不同偶遇之偏災縱有城池克復一兩年者田地荒蕪耕種無人徒有招徠之方殊乏來歸之戶新貽等公同察核若僅照克復年分請豁錢糧民力實有未逮新賦尙難於輸納積欠亦徒有其名擬請援照

蒙亳二州縣及江蘇武進陽湖兩縣之例於克復後加豁一二  
年以示格外體卹除咸豐九年以前民欠錢糧漕米已奉  
旨豁免不計外請將受害最重之績溪甯國旌德太平宣城南  
陵涇縣青陽石埭廣德建平十一州縣咸豐十年起至同治四  
年止并受害較重之鳳陽及臨淮鄉懷遠壽州鳳台潁上霍邱  
滁州全椒來安盱眙天長東流歙縣黟縣貴池建德十六州縣  
咸豐十年起至同治三年止同受害次重之懷甯桐城潛山太  
湖宿松望江祁門銅陵休甯英山當塗蕪湖繁昌合肥無爲舒  
城廬江巢縣定遠宿州五河和州含山六安霍山二十五州縣  
咸豐十年起至同治二年止暨受害稍次之婺源阜陽太和泗

州及舊虹鄉縣壁五州縣咸豐十年起至同治元年止一應民  
欠正雜錢糧銀米商牙魚雜各稅壓徵蘆課各項官租概行豁  
免又亳州蒙城二州縣咸豐十年起至同治元年止民欠錢漕  
并請補行豁免所有安慶新安宣州建陽廬州鳳陽滁州泗州  
長淮各衛錢糧銀米亦與屯坐州縣一律照辦內有津貼一項  
向不豁免第漕艘現已停運旗丁同一被難應請一併按年豁  
除其城池完固及克復多年曾經徵收錢糧之各州縣仍循例  
造冊查明實欠在民者始准豁免徵存在官者嚴行提解藉端  
侵挪則按律參追凡被擾後未經啟徵之處冊檔全失應暫免  
造冊俟將來開辦之年統以未豁年分起照例辦理而本年業



已起徵之處亦難照額全完並俟秋成後另行詳辦等情會詳請奏前來臣等復查安徽全省賊擾殆徧創鉅痛深地方雖有已復之名而田畝多係不耕之土其尤甚者或終日不過行人百里不見炊煙該司道等請將應徵錢漕援例加豁之處均係體察情形迫於萬不得已當該司道七月具詳時廣德尙未克復臣等以皖江南北未能一律肅清又經展轉行查是以陳奏稍遲茲值殘歲將終陽春布澤皖省全清已歷數月合無籲懇天恩准照所請年限分別豁免以紓民困而廣皇仁其廣德建平甯國縣三屬被害尤酷應照原詳加免一年一併繕具清單仰懇

恩施恭候

命下之日刊刻騰黃徧行曉諭使官吏悉絕弊端而災黎均霑實惠以副

朝廷軫恤元元之意所有應豁皖省錢漕雜稅遵

旨查覆緣由謹會同漕運督臣吳棠合詞具奏伏乞

皇太后

皇上聖鑒訓示再同治元二兩年尙有改辦抵徵之州縣雖係捐助軍餉亦與正賦無殊應將該兩年抵徵未完者比照錢糧一例請蠲以免兩歧其蠲免各處現在已有開徵者流抵將來應徵之項卽由各該州縣刊刻免單詳開

恩蠲年分及流抵新賦字樣按戶付執以爲流抵確據合併陳

明謹

奏